

欽  
定  
全  
唐  
文

欽定全唐文卷四百九十七目錄

權德輿 十五

唐故光祿大夫檢校太尉兼中書令成都尹劔南

西川節度副大使知節度事兼管內支度營田

觀察處置統押近界諸蠻夷西山八國雲南安

撫等使上柱國南康郡王贈太師韋公先廟碑

銘 并序

大唐浙江西道都團練觀察等使潤州刺史兼御

史大夫河東郡公薛公先廟碑銘 并序

唐金紫光祿大夫守司空同中書門下平章事充

太微官使上柱國燕國公子公先廟碑銘

并序

唐故東都留守東都汝州防禦使銀青光祿大夫

檢校吏部尚書判東都尚書省事兼御史大夫

上柱國扶風縣開國伯贈太子少傅杜公神道

碑銘

并序

唐故劔南東川節度副大使知節度事管内支度

營田觀察處置等使正議大夫持節梓州諸軍

事守梓州刺史兼御史大夫護軍賜紫金魚袋

贈禮部尚書盧公神道碑銘

并序

唐故劔南東川節度副大使知節度事管内支度  
營田觀察處置靜戎軍等使光祿大夫檢校尚  
書左僕射使持節梓州諸軍事兼梓州刺史御  
史大夫鄭國公贈司空嚴公神道碑銘

并序

唐故光祿大夫檢校尚書右僕射兼右衛上將軍  
南充郡王贈太子太保伊公神道碑銘

并序

欽定全唐文卷四百九十七

權德輿

十五

唐故光祿大夫檢校太尉兼中書令成都尹劔南  
西川節度副大使知節度事兼管內支度營田  
觀察處置統押近界諸蠻夷西山八國雲南安  
撫等使上柱國南康郡王贈太師韋公先廟碑

銘

并序

萬物本乎天  
人本乎祖  
乃立宗廟以安神明德厚流光追  
養繼孝順而下之曰義等而上之曰仁  
國家稽合禮文損

益前載崇功貴仕得祠四室於王制酌諸侯二昭二穆之  
義於祭統見君子盡志盡物之誠惟太尉中書令南康郡  
王懿文經武保合昌運左右德宗格於皇天始恢隴坻之  
旅終化岷峨之俗貴爲上公位極元台克肆忠力乃圖孝  
享作新廟於京師大安里古者揚其功烈銘於祭器近古  
以魯鐘衛鼎追琢先德不若鏤文字於麗牲之碑之爲詳  
也乃謹而書之云公姓韋氏京兆杜陵人自扶陽重侯用  
經明至宰相後裔蕃昌德與位偕積十六葉至六代祖範  
字元禮以字行於代仕周爲車騎大將軍入隋爲沂州刺

史啟土郿城易名曰莊實生孝恪雅有文憲武德初由侍  
御史爲洛州別駕生司農府君諱機爲第一室端誠正志  
休有厥聲專對出疆艱貞復命著西征記以獻太宗嘉之  
剖符澶州修起儒術三典卿曹陟降屯夷操持貴倖不避  
疆禦善理宮室得其時制史氏書之爲唐名臣以夫人隴  
西郡君辛氏配司農生坊州府君諱餘慶爲第二室清和  
修潔履道不回歷右饒衛兵曹參軍以至二千石以夫人  
武功蘇氏配坊州生贈太子少保府君諱嶽爲第三室方  
嚴貞幹政事修明在武后時以直忤旨由太原令移佐睢

陽出入四紀績宣中外歷殿中監剖符八州廬海潮號眉  
徐衛陝所至之邦有威有懷凡再追命以夫人扶風郡夫  
人竇氏配少保生贈太子太師府君諱賁爲第四室盛德  
循行含章自牧歷藍田尉淑聲流聞上纂崇厚下貽風訓  
凡三追命以夫人涼國太夫人段氏配噫嘻自扶陽至郢  
城積丕烈於前史自考廟至顯考廟流熾昌於後葉列於  
禘嘗儲厥義方故南康郡王苞五常貞四教秉靈傑出含  
道中立初誓偏師建奇功捍大患立大節以儒衣法冠授  
律鑿門佩亞相之印綬修元侯之節制就加宗工入掌金



吾撫征全蜀命賜備厚由地官轉天官參總端右平章宰  
政進中書令加司徒太尉鉞鉞秬鬯鑿旂琫戈有嚴有翼  
乃蔚乃赫忠厚博大以阜俗信廉仁勇以成師南蠻納郅  
西羌解辯象胥譯戎捷樂府陳夷歌守正持重推誠畢力  
開地通道者九千餘里生聚教訓者二十一年天文紀功  
刻在金石暨德宗棄天下太上居諒闇危言急病體國忘  
身毅然君子之道卓爾大臣之節永貞元年秋七月考終  
命於理所策贈太師有司奏諡曰忠武公自廟成距今凡  
八年矣以公天子守臣安危注意不得視滌濯承吉蠲而

元兄國子司業聿實奉朝請薦其常事孝友而才稱於士林初公之仲兄曰暈屯田員外郎贈鄧州刺史叔氏曰肇太子左庶子兼御史大夫贈左散騎常侍咸以器望而延襄錫公之夫人贈魏國夫人張氏其祖禰與外王父皆秉國均爲天下華腴嗣子工部員外郎行立銜恤無怙齊喪中禮大凡四廟之支旁尊羣從烜赫昭融不可勝書至若質明光近沐浴盛服虛中以理嘉薦匪懈而無違心大糝沈齊馨香條鬯旣思其志意若聞乎容聲洞洞乎屬屬乎有以見舉十倫而備百順昔素王之以戰則克以祭則受

福其斯之謂乎司業悼手足之凋落感春秋以悽愴永懷  
明發俾篆斯文銘曰

新廟有血靜深奕奕孝孫匪懈元袞赤舄洪闕章章乃侯  
乃王漢稱扶陽唐有南康二十三葉沛然蕃昌四室崇崇  
斯焉享嘗烈烈南康溫良能斷謀猷樽俎文武植幹汧岐  
之西浸沴銷散井絡之下天文昭煥撫封全歸冥漠德輝  
聿修孝享家法無違以昭以穆以嗣以續和氣婉容苾芬  
烹熟子孫小大罔不祗肅神之聽之報以介福

大唐浙江西道都團練觀察等使潤州刺史兼御

史大夫河東郡公薛公先廟碑銘

并序

古諸侯五廟大夫三廟廟在其國聖朝以官品制室數侯伯理外而廟在京師其或覲於明庭入爲孤卿則吉蠲愨信展敬受福居常則冢介子姓薦其常事儼然肅然追養繼孝之義重焉元和五年歲直庚寅浙江西道都團練觀察使潤州刺史大夫河東郡公薛公莘建先廟於長安縣永安里其祠三室初薛之先在殷爲左相在周爲侯國至漢御史大夫廣德爲宣元名臣從廣德十三葉至後魏安西將軍涪陵侯謹乃分五房又四葉至隋禮部尚書道實

道實生皇尚書議曹郎德儒德儒生寶積濟齊潤三州刺  
史揚州大都督府長史寶積生代州定襄道行軍司馬待  
詔公之曾也爲第一室夫人京兆韋氏配焉司馬生衛王  
記室太子司議郎贈太常少卿侃公之祖也爲第二室夫  
人范陽盧氏配焉太常生京兆府奉先縣尉贈工部尚書  
順先公之禰也爲第三室許國夫人吳氏繼夫人同郡裴  
氏配焉惟司馬以兵鈐機畧恢武經邊備惟太常以端士  
雅文仕王國官朝以至先尚書含道安卑四命官而再結  
綬始仕巴西與揚國忠爲寮比及操柄銳於引重賦詩謝

絕不屑就焉獨用義方以振家法積厚餘慶河東公實承之公忠敏廉直和恒簡惠爲政事吏師於文章爲聲詩所施在樂易所至有風采京邑肅清號人理平今皇帝馭天下之初推擇方任聯命爲湖南浙江東西三道長帥歷御史中丞就加御史大夫凡三方二十郡皆據蕃善地人受其賜班制規爲四封宜之乃剏廟貌以嚴祀事楹階俎豆之飾儉而中節祠祔盟薦之儀質以盡敬水草陸產血毛幽全柔嘉滌濯怵惕悽愴思志意以如在交神明而來格君子曰祀之忠也其若是乎初公之伯氏仲氏曰萊曰莘

許國夫人之出而代宗從母母弟也勞謙淑均不自驕盈以功次奉朝請皆至贊善大夫以沒公之母兄曰芳雅有器幹爲北都命介由御史府入爲祕書丞亦不至大官抑代德鍾美朋三壽而享五福者其在季乎昔魯以闕官受祉衛以烝彝崇孝酌用古義揭於茲碑其銘曰

宗廟祭祀禮之重事疊疊河東尊仁安義薛爲諸侯爵列春秋在漢廣德亦居大夫厥後焜煌三祖五房如山崇崇如水湯湯河東楨幹纂服周漢乃尊藩衛乃長邦憲祠宇碩曼蒸嘗嘉薦求福不回升福孔皆入室出戶周旋敬齋

麗牲有碑乃琢乃鏤河東孝享永示厥後

唐金紫光祿大夫守司空同中書門下平章事充

太微官使上柱國燕國公于公先廟碑銘

并序

國朝之制二品已上祠四廟三公品第一雖有始封亦不敢逾焉元和五年相國司空燕國公立新廟於京師蘭陵里司空公以文武偉才肆勤納忠外貞師律入作公相以平乎水土以調乎陰陽深惟祖禰尊尊之義昭穆親親之道乃圖廟食以永代德公姓于氏河南人七代祖謹後魏柱國大將軍周太傅三老燕國文公六代祖實周大左輔



隋贈司空燕國安公五代祖象賢驃騎大將軍會昌定公  
惟三葉有大勳力於北朝乞言而爲惇史體國以全至公  
四代祖益州郫縣令諱德威夫人京兆韋氏曾祖縣州顯  
武縣令諱元範夫人北海王氏王父贈刑部尚書諱汪夫  
人北海王氏烈考贈司空諱夔夫人邠國太夫人京兆韋  
氏凡宗廟之數郫縣爲初室顯武爲二室尚書爲三室司  
空爲親室其配各以夫人氏交神明之道也惟郫縣顯武  
遵道服儒廉退潔修且曰邠曼容陳仲弓吾之師也故仕  
不過六百石而以理效聞尚書沈冥善閉含道特立以處

士燕居至於沒身凡三追命至大司寇先司空廣大而靜  
默恭儉而好禮合二雅循四教推明理古之學貶絕非聖  
之書恬智交養龜頤不感起家益州東陽主簿四徙官至  
寧州真寧縣令又再轉至泗州司馬祿至卑而仁及物道  
未泰而志不懼公卿大夫之閒尊有道而疎利權天寶末  
宰執擅朝惡其剛介不附已故官止郡佐而慶延身後朝  
典加恩亦三追命自密州刺史吏部尚書以至於論道焉  
長子頗專良有士行終洋州司戶參軍冢子頊貞幹強敏  
程功賦職歷戶部侍郎以公事貶泉州司戶贈楚州刺史

幼子頃吏理清明仕至長安縣尉司空公卽第三子也英  
朗閱達剛方博厚才可以扞大患學可以析羣疑彌綸中  
朝則尚書郎京邑廷尉皆有懿績惠綏外服則湖蘇號陝  
二千石察廉克宣功化繇山南東道節度使平章事入覲  
居中策拜顯尊紹文公安公之爵地展盡志盡物之誠敬  
悽愴怵惕精明吉蠲詩云春秋匪懈享祀不忒司空當之  
矣又曰以妥以侑以介景福先公宜之矣公狀先公之行  
其大畧曰孔宣父應聘歷國困而老于洙泗我先君宦學  
於天寶之年而操之者甫忠

謂林甫  
國忠

先君能無窮乎又曰

小子不敏不通先君之大道不識先君之大行不肖之罪也類是者千餘言其太史公自序之風可以論謨酌之祭器德輿外王母公之從母也故其門中風訓獲周知之忝備重任在公下列公以廟銘見授頓伏上聞尊嚴咫尺實奉面命其在傳信不敢蔓辭銘曰

燕文三老弼魏佐周安公定公亦播厥猷鄆縣顯武一同丕矩尚書司空三命追崇義訓忠教公台焜耀乃封故地乃建新廟新廟是宜羶薌告祠齊明盛服乃順乃時卑靜以正如親聽命求福不回孝孫之慶刻銘斯碑以代烝彝

唐故東都留守東都汝州防禦使銀青光祿大夫  
檢校吏部尚書判東都尚書省事兼御史大夫  
上柱國扶風縣開國伯贈太子少傅杜公神道

碑銘 并序

歲在戊寅夏五月甲子居守天官扶風公以病就第考終  
命於京師永命里春秋七十四越三日丁卯追命爲太子  
少傅秋七月甲子歸全於萬年縣少陵原前此又詔有司  
以鹵簿鼓吹飾其儀法以德以勞以榮以哀馨香光大爲  
宗工表式公諱亞字次公漢建平侯延年二十一代孫曾

祖元道皇右千牛王父含章皇上郡司馬贈岳州刺史烈  
考繹皇忻州秀容縣令贈左散騎常侍公承積德之淑靈  
稟中和之粹精山立揚休得時大行歷諫議大夫給事中  
再兼御史中丞繇睦州刺史入爲刑部侍郎三兼御史大  
夫檢校禮部吏部二尚書正色於朝而文憲損益懋功於  
外而藩服輕重宣力以肆勤納忠而愛人稽於法制導以  
善利魏昭子能理大官趙文子能恤大事足以斷國論謀  
王體殆不可及已早歲州里舉經明旣授初命以爲大厦  
之材不可以植培塿南溟之翼不可以棲榆枋於是初服

燕居博通羣書深探理古之道焯見天人之際天寶末盜  
穢兩都宣皇在岐褐衣召見前席三接實貢昌言以扶大  
統乃以處士授校書郎其後三辟大府五登郎位清議善  
價必歸於公大厯中宰府擅朝交利崇黨司諫八年巖然  
貞厲盡規時疾天下直之權臣既誅乃擢左曹先是魏壁  
未下東師旣老密疏方畧深圖理安再勤皇華大布清問  
導以善氣灑其他腸不寧方來克協宸慮故先皇今上皆  
以公之才可以大受姑以九牧四征試其多能鍾陵上游  
提封七郡命公以廉問之政師役之後因緣煩費雜征逋

賦盡削其書未逾年而庸亡自占與夫家相半能厚下矣  
函關陝服介於周秦命公以藩屏之任化用清靜身爲律  
度里閔無吠犬府庭無諍詞四封之內幼艾相賀能去煩  
矣河靈蒲坂陶唐所理命公以尹正之重地本沃饒化之  
純儉盡以解梁之鹽歸於有司凡緡物錢之息其出池澤  
之賦其入歲一萬萬率皆罷廢不以利爲利矣揚州葆強  
都會庶富命公爲節制之帥日講軍實歲修職貢師貞人  
和政成事時河渠填淤積歲爲病乃醜二浸於蜀岡之西  
濬舊坊以股引順地泐而啟閉滌源導滯力省功倍邗溝



之人受其賜而歌頌之矣勤學在公盡瘁其身上思褒優之禮乃命保釐之任昔在成周三后協心公率其道寬而有制且以洛苑汝墳棄地可闢籍其介夫頒以稼器歲皆登成人用洽和地官以之省費游手以之務本分正七年厥後用加徵還京師日俟其復天則不弔竟孤人望夫人范陽郡夫人盧氏茹未亡之哀旣虞而終無子以猶子某爲後悲夫初公文章合雅議論經遠見知於太尉房公瑄受辟於衛國杜公鴻漸以志氣才業英華博厚合於彭城劉公晏贊皇李公栖筠以道義經術研幾盡性合於司徒

楊公綰司業張公參或以公得時中之道或以公有事外之致皆曰聆次公之言可以書紳作憲至於博約後學章明遠至有闕里之善誘焉有平輿之深鑒焉噫嘻昔漢武帝以韓安國爲國器劉向謂董仲舒有王佐之才當理平之時或蹇或徙止於御史府膠西相竟不得總秉國成扶贊化育則公之位望終不相配亦如是耶昔魯視豐碑衛銘烝彝近古鼎不以窳追琢介石揭於道周參魯衛之遺也公從父弟太子賓客黃裳德位相倫友悌相輝功衰之喪加人一等以德興辱公之知俾論風烈懼詞之不敏而

無愧焉銘曰

昔在周邦實憲吉甫於惟杜公亦備文武武弁戡戡玉聲  
鏘鏘公在左垣羽儀周行鈞膺濯濯文馬翼翼公為元侯  
表率方國推誠導利興事任力陟恪清時作稽忠德冢宰  
是職周郊是式宜永介福如何不淑壽堂幽闕祿印榮飾  
勒銘於茲山石無極

唐故劔南東川節度副大使知節度事管內支度  
營田觀察處置等使正議大夫持節梓州諸軍  
事守梓州刺史兼御史大夫護軍賜紫金魚袋

贈禮部尚書盧公神道碑銘

并序

惟盧公諱坦字保衡涿郡范陽人也代爲北州冠族曾祖  
審經皇齊州祝阿縣令祖河童徐州豐令父巒明經上第  
贈鄭州刺史仍代以六百石廉厚有循化先君子名經澡  
身曠僚追命至公始延耀發舒烜赫顯尊乃舉較畧以施  
金石公始爲同州韓城宣州宣城鞏縣河南四縣尉監察  
御史裏行殿中侍御史內供奉眞爲殿中侍御史戶部員  
外郎尋轉庫部員外郎刑部郎中皆兼侍御史知雜事拜  
御史中丞除右庶子又以御史中丞爲宣州刺史宣歙池

觀察使入爲刑部侍郎轉運鹽鐵使戶部侍郎判度支又以御史大夫爲梓州刺史劔南東川節度使元和十二年秋九月薨於位其年六十九公含章特達剛健篤實粹溫而有遠猶忠厚而無流心自周圻滿歲令聲籍甚時宰得君實公之私關一其燠灼不受慰薦徐用常調復還洛都其仕外臺贊佐東都守臣寢病中貴驕暴以甲士五百棲於府中衆情怪駭慮有急變公感慨憤怒以正詞讓之匪人慚悔回慝不作其佐轉輸事任循明河之舊防有梁公堰者發決歲久爲之濬理鍾水導滯厥猷茂焉李錡以戎

車督運貪猾無狀公端正中立用十年不徙官與從事李約李陵暨今相國裴晉公相繼引去其在憲司貞厲閑邪元和初天子憫人之重困徵貢之無藝方任受代至京師尚修任土者俾論如法赦令懸焉梁閩二鎮首奸斯禁公立奏劾使待罪於朝多士竦聽四方風動李錡之誅也既絕屬籍有司請發其先墓自淮安而下悉皆夷之公諫曰神通有佐命勳乃國之宗臣守官以死奈何一旦以錡故而戮斲九原上改容嚮納特給五家灑埽冥冥之下將加法而加恩君子多之其在宣州歲丁驕亢順其發斂以救

艱食闕渚田於壅棄置種食於鄉亭多方愛人人用饒給  
或曰持力盈矣盍上獻乎公曰勤人市恩所不忍也出軍  
食緡錢四十萬以代征徭爲秋官領使去宄食百輩自江  
而南均輸池澤委分部大吏得命其屬以能否進退公不  
撓焉責其成以驚功吏採其要而得均節其爲地官也以  
府帑之羨繕終南宮百堵皆興六職以嚴備邊力嗇者費  
大萬兵食以饒亭障以安有臨淮守前蒞事於代北者或  
告其畜馬百駟且有奇種事下於公公使從事覆之上遽  
命小黃門按之公曰如是則廷臣可疑近習可信臣不敢

奉詔疏三上上方感納七年河流毀西受降城城守以聞  
宰臣請徙於天德公曰河決不過退三四里功費無幾何  
天德墉礮回遠非所利也時之宰臣議異故公議格而有  
梓潼之命其後城守以憂死代之者人歸咎而戕之盡屠  
其家天德幾亂公之前知若著蔡焉梓人自井絡挺災侵  
淫亂畧逮公至也理之如家雜征牟利者去之邊防虛籍  
者實之底貢之外無異獻吏祿之差有恒給師貞人勤政  
事和理鎮安一方而大庇廕之樞輅之引鰥孤哀送自鄭  
中至劔門以五百里祭奠相屬有詔贈禮部尚書不視朝



命著作弔祠法贈加數母弟前絳州刺史常師以器望歷中外以友愛重人倫長子玠壽州霍邱尉冢子大炎前明經調拔萃以地勢嫌抑次子大璟河南府參軍幼曰瓚未仕大炎大璟等咨於叔父與伯季竭誠信以明年正月日祔葬於東都穀水之陽先封禮也惟公早精六學尤邃三禮晚節究觀歷代史端誠正議宏達卓越歷於大朝名致直言秉剛履險不疚不跲煢煢然有史鮪汲黯之遺風序賓樹善銳於簡拔同升諸公者十一人並列於藩者若干人喜士睦親造次以之用之不求備求之如已失洪範之

攸好德大雅之人鮮克舉惟公有焉某建中末與公同爲  
丹陽公從事中歲左戶請爲郎及茲建牙壤地相接周旋  
出入殆四十年今聖朝多士如林永懷舊故凋落向盡保  
衡又沒可勝慟耶公之記室大理評事羅立言狀公之行  
將諸無容之請牽課鄙僊詞達而不文銘曰

盧公懿懿戴仁抱義其用不器迪簡在庭大猷是經穆然  
儀刑再貳六職兩居方國人用景式溟波卿雲天矯輪囷  
奮其翼鱗物情未直壽寵未極生死糾纏洛師舊鄉穀水  
之陽先人所藏孝子悌弟乾肝焦肺寧此後載刻飾龜螭

發揚聲詩傳信在茲

唐故劔南東川節度副大使知節度事管内支度  
營田觀察處置靜戎軍等使光祿大夫檢校尚  
書左僕射使持節梓州諸軍事兼梓州刺史御  
史大夫鄭國公贈司空嚴公神道碑銘 并序

昔周以淑旂錫韓侯奄受北國晉以黼冕命士會乃將中  
軍惟鄭國嚴公諱礪字元明再總方任實顯兵柄采飾昭  
融與功化俱初公從祖兄太師馮翊忠穆王政成於梁勳  
在盟府公以支郡二千石護和門賦輿太師旣沒德宗命

公爲代於是都尹守開幕庭佩亞相之印綬建元侯之麾  
節守之以義和之以仁器局宏厚姿儀碩大每務根本不  
沽名聲勤身七歲績用大洽優詔就加禮部尚書永貞紀  
號井絡上變軍司馬因守臣之喪席凶器以要好爵而又  
劫蜀人圍梓潼天子旰食西南愁擾公毅然飛章條上方  
畧請以漢中之師率先進取畫山川之阨塞調餽饋之名  
物出其不意可以鼓行嘉猷急病慷慨忠壯實蒙可報克  
厭帝心乃命將嚴秦授以機畧自漢源至神泉凡數十合  
其閒下劔門覆盪口收劔州破契丹命裨校可提彌誅斬

虜之特將文德昭然後分秦險阻潰其心腹或設伏以遮擊或出奇以夾攻我常賈餘而虜始奪氣以至於援鹿頭清岷峨旋禁旅於天上快靈誅於闕下賦車馬以懸束備糗糧以飛輓慮之於始倚以成功故墨詔曰士季定克蜀之謀叔子建平吳之策惟君知臣其至矣哉公博貫書術研幾易象始以處士詣草堂禪師無相修桑門之法邦鄉督勉甫釋巾褐爲梓州元武尉本道表爲遂州兵曹掾大歷中西戎不虔疆場大駭領偏師援灌口實茂厥勞謙卑不居建中末太師以藩衛之崇當孝文省方之運推擇從

事導迎屬車豈伊異人在我族類拜大理評事充節度巡  
官儲待百牢以奉行內轉大理司直改華州司兵參軍節  
度使李元諒署爲推官以憂去職旣除猶毀太師以武備  
爲重將才實難表爲太子司議郎兼監察御史左廣之戎  
政轅門之後奄無不綜焉俄拜興州刺史寬明簡惠以靖  
邊部居一年政成復修軍志終繼二馮之化而居八命之  
尊投艱履險勲伐章灼蓋裕於才能而推於忠厚然也元  
和元年遷尚書左僕射三蜀旣平拜梓州刺史劔南東川  
節度觀察使且以資陽陽安等六郡四十餘城隸焉加地

進律疇庸之典也四年感疾春三月甲申薨於理所享年六十有七追命司空弔祠有加嗣子天興尉公甫銜恤茹毒奉公之喪以其年秋七月辛酉葬於京兆萬年縣鳳棲原從象數之吉也惟公之先自兩漢二隱湛冥善閉曾王父哲閱覽博古鬱爲聞人阜囊危言劇切后黨繇荆王府司馬出爲劔州刺史因徙家鹽亭而休老焉大父順恬淡不仕父審微義方貽訓聖朝以孝理天下贈工部侍郎公之諸祖父或著作祕書侍講東朝或含章射策剖符居郡羣從兄弟有太師之烈焉其他履臺郎二千石者率以才

行自贊惟公以文無害歷掾吏部從事發揚武毅奮迅軍籍分閫授鉞爲時信臣循理遵職好謀善斷明利害之向習俗化之變司馬遷所謂扶義俶儻不令已失時其有功名也宜哉林鍾烝彝先古之制所以論次懿績章明永久門吏孝子之心也其可沒乎以德輿嘗志太師之墓亦草興州之詔耳目事實其詞不誣是焉篆刻以表神道銘曰地中有水利用行師於惟鄭公藩屏清時蜀川橫潰人用怪駭公披肺肝請埽蜂蠆賦車誓眾沐浴齋戒吉語日聞嘉猷是賴以犒以饋閒關感慨如飛如翰輝耀宏大旣理



漢中乃遷梓潼武以貞師文以撫封八旒七章既長宗公  
乃倚乃伏如何不淑樹檟蒼蒼墓門肅肅立茲介石永表  
陵谷

唐故光祿大夫檢校尚書右僕射兼右衛上將軍

南充郡王贈太子太保伊公神道碑銘

并序

昔伊尹相湯伊陟相太戊咸有一德格于上帝其後伊籍  
以敏辨仕蜀爲將軍伊馥以勇力佐魏爲司空曠遼縣代  
復纘休緒者曰南充郡王諱慎字寡悔剛毅勇悍鷹揚鶚  
立勞動四朝終始一心涉覽春秋戰國策太史天官五行

之書用善射中鵠補廣州綏南府折衝都尉丁太夫人憂以毀瘠聞初公之孤也幼不知先子之殯將祔二尊日號於天魂交神還胎嚮誠感壤而樹之率禮無違大厯中嶺南裨將哥舒晃盜殺其帥呂崇賁以亂竊據府中南方蕭然江西連帥路嗣恭承詔出師命將孟瑤暨公討之公以水陸士徒分道鼓行晃之謀主蘇渙騎將王明悅鴟張蟻聚皆據阨害公曰寇不可翫勝無幸焉毒之酋腊盡在是矣疾力交粹必亟吾中乃舂其喉而潰其腹斬首三千級下韶州其明年戰於把江口水道湍悍戈船趲趲公浮筏

寘薪迎風縱焰寇之焦沒於水火者終夕有聲又明年軍於渭口於端州於潮陽次於廣州冬十月斬晁渙於泔溪揭其首以徇幕府上功拜連州長史授撫虔江三州別駕建中初德宗訓齊萬方端正百度以梁崇義負阻江漢未嘗會朝詔東諸侯分道問罪公實領江西偏師而統於希烈希烈以牒書署公漢南漢北兵馬使公明智牢讓獨率所部兵大破翟暉於蠻水俘徒三萬以至於斬崇義平江漢厥功居多希烈愛公愈深公懼之愈切一旦決與數騎遁歸既而希烈以急變聞且賂公以堅甲善馬爲之反閒

密詔嗣曹王卽訊因俾論公如法公方握兵符在境上微聞有命斂手就召曹王挹公名義偉公姿材取酒爲壽交歡感泣手疏上列辨其冤誣委之先偏激以自效乃畧黃梅次長平遇劇賊韓霜露引滿中股斃於萬眾之前其徒相蹂躪死者十七八拔蔡山取蘄州降山寇李良領蘄州刺史剖符爲王加御史中丞興元巡狩之歲使臣底貢次於蘄口時希烈已屠陷大梁遣其腹心杜少誠引勁兵絕江流公以行師七千列樹三柵破之於黃岡少誠遁走蘄驍將許少華封其尸爲萬人冢進圍安州希烈遣其甥劉

介靈來援擊於應山生得介靈與郭嵩李廷玉降七千人  
收戶一萬四千人夫婦男女耕桑安堵乃督安州加御史  
大夫真食百室二年五月引兵攻隨走康叔夜於厲鄉獲  
馬牛輜重以益軍實表僞署刺史李惠登爲之刺史終以  
理行聞十二年用久次就加右散騎常侍後三歲天子以  
公積功勞使中貴人持命書金印卽本郡授公節度觀察  
使且裂齊安爲支郡尋詔公兼統荆洪潭三道之兵討叛  
於蔡敗之於三州港營於義陽戰於申斬級千數有詔班  
師就加刑部尚書進右僕射今天子嗣位拜章入覲真授

右僕射俄檢校左僕射兼右金吾衛大將軍坐細故退爲  
右衛將軍明年復檢校右僕射兼右衛上將軍元和六年  
十二月晦寢疾薨於光福里不及懸車者二歲追錫太子  
太保同盟諸侯皆使其命介來弔祠視喪事明年夏五月  
庚申葬於萬年縣某原鹵簿騎吹如葬禮初公之曾王父  
皇太子通事舍人澄生左衛長史悅悅生贈太子太保衡  
公之祖禰也積善餘裕追崇以大惟公以武毅通文理硯  
席楷隸心師自得感慨出倫談辭如雲起南方裨校屢陷  
軍陳勢若猛鷲不辭劇易急病而益裕其才履危而不昧

於邪悃悞忠直爲中興名將以至於授英蕩題龍泉有功  
烈勳勞於天下脫劔薦紳從容漢廷徼循師長文武二品  
啟體歸全追榮宮師豈徒然哉公之息男十六人其冢嗣  
曰宥左領軍衛將軍押右神策軍牙門之職能率義訓以  
揚家聲初公來朝也詔宥以侍御史領安州刺史由二千  
石入筦南北軍教忠移孝情禮盡在宥以鄙夫與太保同  
居里閭且以理命遺緘辱徵斯文表諸神道不敢誣也銘

曰

在殷保衡負鼎而相惟唐南充推轂爲將泔溪之刑嶺表

乃平蠻水之捷漢南以清蔡兇滔天曹邸鼓行公率武旅  
迅如風霆斬春安陸連下劇地專城建牙宏大名器交修  
威懷較著功利介圭會朝脫躡師帥南宮端右武侯緹騎  
沐浴休明保完富貴歲降婁兮月大呂一氣散兮無處所  
繫甲車兮馬鬣封九原夕兮闕音容揭此介石厥聲無窮



欽定全唐文卷四百九十八目錄

權德輿

十六

唐故江南西道都團練觀察處置等使中散大夫

使持節都督洪州諸軍事守洪州刺史兼御史

中丞騎都尉賜紫金魚袋贈左散騎常侍崔公

神道碑銘

并序

唐故成德軍節度營田副使正議大夫趙州別駕

贈壽州都督河閒尹府君神道碑銘

并序

唐故右神策護軍中尉右街功德使開府儀同三

司守右武衛大將軍知內侍省事上柱國樂安

縣開國公內侍省少監致仕贈揚州大都督府

孫公神道碑銘

并序

故正議大夫守門下侍郎同中書門下平章事成

紀縣開國男賜紫金魚袋贈太子太傅貞憲趙

公神道碑銘

并序

故朔方河中晉絳邠寧慶等州兵馬副元帥河中

絳邠節度度支營田觀察處置等使元從奉天

定難功臣開府儀同三司檢校司徒兼中書令

河中尹上柱國咸寧郡王贈太師忠武渾公神

道碑銘

并序

欽定全唐文卷四百九十八

權德輿 十六

唐故江南西道都團練觀察處置等使中散大夫  
使持節都督洪州諸軍事守洪州刺史兼御史  
中丞騎都尉賜紫金魚袋贈左散騎常侍崔公

神道碑銘 并序

博陵崔公諱某字某仕至御史中丞洪州刺史江西都團  
練觀察使元和七年冬十一月某甲子啟手足於郡舍享  
年五十五皇帝不視朝遂以左散騎常侍印綬命郎吏弔

祠明年十一月祔窆於東都河清縣先正之大墓又明年其孤仲謨纂其代德家法命書愍冊請刻石繫辭且自本曰炎帝之後秦夏里黃公廓漢東萊侯伯基東漢長岑長駟濟北相瑗晉左僕射洪之代也洪七葉至北齊禮部尚書文恭公聖念聖念四葉至君曾祖知晦應銷聲舉授兗州金鄉丞王父瑜朝議大夫忠王府諮議贈太子賓客烈考灌再爲澧州潭州刺史以御史中丞領湖南觀察使當宣武之際用愷悌修政爲代吏師優詔錫今爵推理行第一神道繆鑿遭罹戕害他日以君之勤贈太子少師君慈

和修潔平粹文敏以勤身之功善揚積厚之風類始以門  
廕調河中府參軍歷邑丞廷史從事察視凡南臺外三爲  
殿中侍御史嘗以公事貶台州司馬聯帥表於理下旋以  
上介入拜侍御史遷考功員外郎度支吏部二郎中商常  
二州刺史以至按部撫封爲太子守臣所居可紀漸漬光  
大其爲郎中考課經費彌綸綜覈三劇曹無留事瀕江郡  
國仍歲天癘而澗河之東凶旱特甚縣官恤然臨遣使臣  
發吳之公聚賑越之難食君受載馳仁聲先翔噢咻憚怛  
布施優裕不樂宴私不嘗酒肴東人鼓舞感動肝膈其爲

常州漕引河渠通申夏二浸以宣利澤郡有聽斷之下有如神明及處方任爲仁由已凡封逋負數千萬夫家病焉君曰不曠然大貸無以休息悉用條上盡蒙可報然後均列城之田賦去都府之煩弊吏措手足事無尤違仁矣哉詩稱仲山甫柔嘉維則申伯柔惠且直惟君亦柔而立溫良而能斷教訓導利外寬內明函達於雅故勤施於政事稽洪範三德其甫申之柔乎凡歷柱下史東曹郎皆居代官列郡二千石方帥執法皆循風訓江湖之間壤地相錯蒙君父子仍代之澤豈天意之裕斯人耶鄙夫久貳六官

與君周旋甚熟頃忝宰府詳知報政迨茲居守而仲謨儼然焉衰疾不文直詞傳信銘曰

矯矯少師莅湖之南播遺懿兮抑抑常侍在江之西施美利兮仍代元侯寬明輯柔政樂易兮此物此志四封茂遂古循吏兮宜永介福奄然厥復左貂襜兮河清鮮原羽葆翻翻潛智氣兮有涯必盡流此淑聞斯可貴兮刻飾豐碑崔嵬龜螭永爲識兮

唐故成德軍節度營田副使正議大夫趙州別駕

贈壽州都督河閒尹府君神道碑銘

并序



詩之小雅曰尹氏太師秉國之均大雅曰王命尹氏戒我師旅然則代爲天子三公大夫參掌文武故吉甫有作憲之美翁歸爲兼備之才周漢以還似續忠厚今義武軍節度使相國延德郡王司徒公之從事曰澄從公來朝朝有賞典式寵戎輅當簪法冠永懷罔極之恩願迴追錫之命司徒嘉焉以其詞列上先皇帝孝理天下愀然曰俞繇是輟功次之遷遂飾終之澤迺三月丁酉有詔贈澄之先人正議大夫趙州別駕錢爲壽州都督先夫人吳郡陸氏爲吳郡太夫人印綬璜珩光耀幽窆哀榮所被名教多之澄

又稽甲令繹家牒以漏泉告第之恩有螭首龜趺之制於是傳詩而系辭云都督以諱爲字天姿剛健經術百氏陰符六韜皆所講習通其旨奧天寶初舉進士不第幕府上功盧龍府別將稍遷瀛州高陽縣令歷恒州司法參軍藁城令寶應初以太子中允兼恒州長史錫金印紫綬廣德中遷易趙二州別駕節將推其才表爲營田副使理二縣佐三郡勞徠安集周爰圖慮以饑饉之歲丁師旅之殷敷其慈和得以安靜議者以魯仲堪龐士元方之旣董大田實居上介俗知禮節師以阜饒方陟勞課奄然大病以大

歷七年秋七月啟手足於恒州靈符里享年六十一以明年夏五月窆於藁城縣東子樂原夫人嵐州刺史道之孫密雲令昌嗣之女能以仁順洽於宗姻晝哭既除喪十四歲以貞元四年冬十月歿於道州以十一年冬十二月祔焉從魯禮也有子三人長曰渾唐縣尉次曰濤趙州司功參軍皆不幸短命澄卽其幼子也尚學理文敏信誠厚雅有恂悞不隨波流山東士大夫多稱其名義由北平尉爲定州功曹掾辟司徒府主其謀猷每懷戎章驅疾傳陳賦輿之事明利害之鄉叶於中權皆有功效洎元侯入覲天

子錄功賓僚傳校命賜優重而澄永懷霜露願貴邱封感於宸衷盛此徽數君子曰是舉也有以見尹氏之孝思都督之流慶上公之與善元首之加恩以風四方以厚士教雖澄之未貴仕其所以宏助者多矣初都督之禰曰本古仕至常州武進尉武進之父曰正義歷許相宋三州刺史司農少卿司農之父曰良終滄州司馬司馬之父曰文哲仕隋青泗曹濮陝宋洛相等州刺史本郡太守大理卿戶部尚書皆有德善揚於官業蓋二雅遺烈之所從來遠矣德輿門人蘭陵蕭籍與澄爲寮同在公府狀其往行兼列

命書忝貳邦教敢忘聳善乃爲銘曰

尹氏代律聿修文武自周縣漢炳耀圭組懿懿都督遠承  
丕矩方騁夷塗俄歸野土慶延嗣續職佐藩垣遠從上台  
來翊天門追飾二尊輝榮九原密印畫綬隼旗魚軒官纜  
掾吏跡重知己恩迴大君澤及先子以盡忠養以宏孝理  
揭立貞珉芳馨在此

唐故右神策護軍中尉右街功德使開府儀同三

司守右武衛大將軍知內侍省事上柱國樂安

縣開國公內侍省少監致仕贈揚州大都督府

孫公神道碑銘 并序

元和元年冬十月內省少監致仕孫公寢疾薨於京師廣化里私第享年若干十有一月有詔追贈揚州大都督法賻布絹各以百數明年十一月葬於涇陽縣之某原命婦諸孤家老故吏以服勞詔祿恩華慶賞之不可以不識也請鏤豐碑揭於鮮原云唯聖唐仁澤汪濊威靈燁燿乃法辰象以嚴武師惟肅宗創新軍於北落克靖患難惟德宗置中護於內朝而爲總制翊宸嚴以宣七德正師律以張四維勤勞警巡東拔忠厚不失於正克保其終者惟公有

焉公諱榮義字某其先吳郡人也軒裳延耀本冠邦卿版  
籍推遷幸來京轂今爲京兆涇陽人曾祖翼皇右金吾衛  
中候祖庭玉贈兗州刺史父知吉皇開府儀同三司行右  
領軍衛大將軍知內侍省事上柱國魏國公或徵循筮仕  
道在安卑或麾節加恩義彰追遠以至於先公貴位名重  
前朝宏內省之事任受大封之徽命承休襲慶終踐代官  
裕蠱教忠備遵家法公端良謹重潔白詳明事無尤違心  
必誠信至德中策勳至上柱國起家掖庭局監轉掖庭局  
丞官闈局令再爲內謁者局敘品至朝議大夫恩錫章服

又加中散大夫貞元十七年充右神策軍護軍中尉判官  
纔浹辰遷內常侍充副使越翌日兼右街功德副使十九  
年拜右驍衛將軍充右神策軍護軍中尉右街功德使明  
年有詔知內侍省事歲中加特進右武衛大將軍封樂安  
縣開國男德宗棄天下順宗諒闇整訓爪牙勤宣翼戴進  
驃騎大將軍益封樂安縣公食邑一千五百戶今皇帝踐  
祚以年疾加侵固辭戎政重違誠懇恩禮舊勞拜開府儀  
同三司既積沈恙累章陳乞乃下優詔遂其致政之請焉  
初公以大歷中奉使交廣裔夷嗇禍有梁氏尋氏聚爲寇



勳公與守臣決策潛師盡殪南服以清厥猷茂焉建中中  
將軍許庭遊將命北蕃公爲之介屬張光晟醜斃其眾與  
陰方爲仇野心煩言將逞憾以報才全智免終靡鹽而歸  
俄而希烈干紀淮瀆不靖受中旨合兵符取桂嶺湘川之  
眾益漢陽夏口之鎮以當劇賊且護成師收應山援安陸  
凡鄂之成績公有助焉尋又監慶州行營兵馬皆奮策畫  
用寧邊鄙暨夫拊循爪士參贊禁營乃昇副車超踐中尉  
講軍志循武經比詩人祈父之職得易象貞師之義承睿  
謀以決勝授羣帥以懋功肅肅然安人而禁暴雄雄然由

中以制外積勞不伐受寵若驚恩波深而守以慎懼爵祿厚而不萌侈汰其或方國問遺歲時交歡公曰有齒以焚古人所誠無脛而至廉士不居外不易於人中不易其操泛然虛受悉助軍實強力匪懈推誠在公或籍在行閒而法干吏理苟簡書所至必械繫送之心無私焉直而後已當親重之任護腹心之臣入近天子之光出列諸侯之上豈徒然哉先魏公信嚮釋氏薰修心法嘗於邑里奏建寶應眾善寺五代之壤樹依焉至公又請於寺內置無垢淨光法華三院塔額檀施臧獲爲淨人者十輩所以修先志

所以崇佛乘孝子信士斯爲至矣昔漢室以灌嬰爲謁者  
隨何爲護軍正伯參珥貂之制環列據銜珠之重驃騎儀  
同品皆第一護封益食事軼常均及屏去燻灼脩然恬曠  
家居得謝以至沒身其動也本兵柄而不可犯其靜也冥  
道樞而無所累納忠循理議者嘉之前夫人郭氏驃騎大  
將軍贈開府儀同三司全羽之女克恭婦道不幸先沒今  
夫人東平郡君呂氏柔嘉有儀晝哭遵禮奉終誠信以前  
夫人祔焉長子某次子某官某等棘心雪泣銜恤無怙趨  
承軒禁嗣續忠勞公之兄前保壽寺上座內供奉監義大

德道系捨筏之宗已超學地在原之痛猶切孔懷公之弟  
某官某等同氣聯華致美有裕忍哀襄事先遠是圖龜兆  
告猷芻靈啟路卜佳城於此室體魄焉依轉樂石於他山  
聲塵斯在銘曰

大君御極修理百職抑抑樂安逢時竭力超侍軒墀抱公  
絕私乃將命令以會師期保合誠信周旋險夷韜鈴講貫  
印紱葳蕤帝座之西星文昭晰鉤陳之北武旅森列爲之  
總制所以關決凡在拊循士皆感悅委重三朝成功九霄  
退身崇讓息偃迢遙逝川閱水截道驚颺恩崇幢蓋吹咽

笳簫涇流湯湯谷水池陽舊邱崇岡若斧若堂宰樹如雲  
仁祠在旁刻銘於茲兮永永不忘

故正議大夫守門下侍郎同中書門下平章事成

紀縣開國男賜紫金魚袋贈太子太傅貞憲趙

公神道碑銘

并序

在漢孝宣厲精理道則有魏相通故事丙吉知大體百職  
修明中興有聲惟皇帝在位十四祀得賢相成紀公趙氏  
受天清淳佐時緝熙本洪範之正直躬大雅之明哲左輔  
右弼調和鼎味降祥而生盡瘁而終時貞元十三年年六

十一歲上震悼不視朝三日詔奉常具儀法冊贈太子太傅又俾百執事爲位哭於其庭弔祠禮賻率有加等二府之屬或銘其德於壽堂或狀其行於考功有司稽實諡曰貞憲公之盛業斯謂不朽又舉其始中終之畧識於神道公諱憬字退翁天水隴西人其先成子之文宣子之忠文子之知人左邱明太史公實書之曾王父仁本皇司列少常伯同東西臺三品以忠清勵翼多所發明乾封總章之際號爲稱職王父贈趙州都督誼厯右司郎中乾封縣令司僕少卿烈考贈鄭州刺史道先仕至洪州錄事參軍惟

祖禰含章故慶延追錫崇構丕矩復大於公公保抱之歲  
生知色養羈貫之年則無幼志及夫被儒服踐法言敬直  
而文肅莊而溫端誠博物錯綜古今非大中至正不接於  
心術寶應中元宗崩肅宗幸梓宮有司議方中復土之制  
時西鄙日聳歲饑人流公以王者追孝恤禮宜儉褐衣上  
疏詞指約明君子曰此劉更生諫昌陵之言也息偃江介  
名聲籍甚始佐州司乃辟戎車自試守江夏尉三遷至監  
察御史其後翹車繼轍賢侯虛左大凡難理之府皆待公  
爲重歷殿中侍御史太子舍人丁太夫人憂柴毀孺慕殆

將死孝感導善氣降爲嘉生有芝煌煌秀於壤樹之側公  
默而去之人莫知者旣免喪徵拜水部員外郎未幾檢校  
工部郎中副湘中七州軍事居一年詔領留府尋踐方伯  
以中執法錫金印紫綬罷職家居拜給事中執法懷和北  
狄有下嫁冊命之禮復兼憲丞以副皇華旋軫未至遷尚  
書左丞俊又用彰皆以貞勝其初撫封上狩於漢中守臣  
之任憂寄愈切公恤隱布和仁而愛人與師知訓善吏樂  
職行之三年教化明備底貢有藝賦政不煩絜矩以杜奇  
衰露章而無吐茹飛語雷動明誠山立受代踰年事實敷



聞故有左曹之命講貫舊章惟直是視刑或失入議將必  
還公望日盛其勤靡盬故有和戎之役致賜諭旨協寧殊  
鄰疆場之言專對而不跲紀綱之僕承事而不征保就安  
利北方感悅故有在塗之拜整南宮之紀律起郎吏之功  
緒風望素重法制尤精常歲終舉吏可以長人者或以其  
細故深詆將以病公公乃移書自訟請下其考有博大之  
度無怨欲之私一臺承式六轡在手持剛體要善否有章  
故積公輔之望貞元八年夏四月拜中書侍郎平章事明  
年五月轉門下侍郎以厚德載物以全才宣化舉直盡忠

敷納詳明正百度之本去一朝之便事有統紀心無面從  
嘉猷讜言鎮定宏大謙厚而不伐持平而居易闢邪塞違  
貞厲而不校陟恪始終帝載用和熾夫先正常伯歷左肅  
機東臺侍郎充著休功再參大政公皆踐之是以似之嘗  
以爲漢庭諸公罕備其用以石慶之醇謹而不能關決薛  
宣之方畧而失於煩碎翟方進之通明而固其位公孫宏  
之節儉而近於名公備有其長彼實多缺唯丙魏所履我  
無愧焉嚮使天與之年盡行其道則公之所化可勝旣乎  
故其登庸也士之仁者相賀而不仁者相弔其全歸也士

之仁者相弔而不仁者相賀斯可知已至若睦中外之姻而均其祿賜嚴宗廟之祀而不理第室啟手足之日家無餘財奉終卽遠待恩禮而後備難矣哉嗣子宣亮全亮元亮承亮等伯季以門子爲宏文生叔仲始解巾受祿皆稟德風幼而孝謹以十一月景午時得吉卜奉公之喪祔窆於河南緱氏縣景山之原禮也以德輿叨居宰士嘗辱深知職奉贊書備詳盛烈俾刻金石聞於無窮銘曰

晉有成宣代稱忠勳先正常伯匪躬事君繼復於公爲時獻臣德不踰閑心不違仁貞其所履以翼天子大猷是經

中立不倚乃賦明命宜躋遐紀吾道方伸修塗遽已緱原  
蒼蒼宰樹成行令名章章樂石在旁噫嘻太傅之風永代  
不忘

故朔方河中晉絳邠寧慶等州兵馬副元帥河中  
絳邠節度度支營田觀察處置等使元從奉天  
定難功臣開府儀同三司檢校司徒兼中書令  
河中尹上柱國咸寧郡王贈太師忠武渾公神

道碑銘

并序

天地訢合以生萬物其成歲功也則有肅殺震懼之助焉

君臣保乂以熙百志其講武功也則有經綸翼戴之輔焉  
龍蛇起蟄山澤通氣與運相值有開必先斯太師所以宣  
力四代稽謨七德輝曜威靈勤身濯行霆擊風行乃緝熙  
於光明故凋戈淑旂以嚴師律黃旒元袞以正台曜湛露  
彤弓以覺報宴納書追命以榮恤禮蕃錫始終如公之功  
公諱瑊字某其先夏姁之後爲淳維漢劉之代爲渾耶或  
強爲與國或分以保姓貞觀中開置州壤就加官師曾祖  
元慶皇豹韜衛將軍靈邱縣開國伯祖文壽皇太子僕贈  
尚書左僕射考釋之皇開府儀同三司太常卿兼御史中

丞寧朔郡王贈司空惟靈邱紹先公之職居次卿之重僕射以積厚克家寧朔以偉才雄邊貴仕崇勳乃列茅社流光追遠是加密印回復介祉間生元臣功昭於前人德合於大君建中癸亥翠華西狩公以大司馬艱貞翼從部勒戎車揣摩殺機勤勞行內爲上心膂登壇授律誓命交感如漢拜淮陰侯故事而又加焉乃進左揆遂參大政總賦輿而爲之師長恢王畧而以北伐凶黨盡銳壁於武亭公以事鉅師老則傷威重正合奇勝在於疾力奮寡擊衆鼓行無前殲夷潰溺如建瓴水中堅席勝又復於咸陽長

轂啟行旣門於延秋會西平王以東諸侯之師清宮獻捷  
公乃抑其賈勇須彼成功窒士心之剋伐息兵火之氣焰  
然後窮追斬級寇孽以平備法從於清蹕捧大明於黃道  
告類薦功登拜上台撫封尹正復與虜碯時北平王出大  
鹵收絳臺而公已總成師下左輔於是緝忠力揚奇鋒復  
離官拔堅壘衝陣壓境傳於蒲津金鼓之聲氣相合山河  
之表裏皆復渠魁授首師帥協附安流以濟方軌而前士  
不罹傷工不易肆殄寇正刑四方咸齎論道進律乃平水  
土秉誼靖人以修班制休嘉賁於草木利澤逮於鰥寡言

爲軍志動爲吏師貞元景子政成一紀進掌邦教遂居左  
弼十五年冬寢疾十二月辛未薨於理所享年六十四皇  
上悼歎不視朝五日冊贈太師賻襚弔祠有司備物大僚  
襄事明年二月甲申葬我太師於萬年縣洪固原太常跡  
其功德奏謚曰忠武禮也初公年十一以將門子仕於邊  
部未弱冠五遷至左驍衛將軍始從朔方之師戰黑山次  
從隴右之師摧石堡又嘗西出臨洮奪昆夷之善地而爲  
之壁壘北絕大漠破獫狁之堅甲而焚其廬帳又從汾陽  
王臨淮王討反虜於山東南攻贊皇北取真定射其突將



李立節貫於左肩斃之又五遷至太常卿皆以功次其閒  
開地於河曲以靜九蕃宣威於陝西乃定三川凡王師之  
所以剋獲都邑元老之所以發揚蹈厲公必居其先偏而  
當其勅劇故以御史中丞爲靈州左司馬以御史大夫爲  
邠州刺史以工部尚書爲單于大都護專征上郡榆林之  
地入爲左金吾衛大將軍又以戶部尚書奉晉王出車之  
重自時厥後投艱感慨能納大忠以恤大事理蒲十六年  
再陟公台以司空兼侍中以司徒兼中書令大凡歷官二  
十八次真食千八百室居節制者五副元帥者四材力絕

人始封樓煩方內洽平乃建咸寧凡汾陽王九代之勳公皆左右四履之地公皆踐歷憫冊師禮法謚尊名公皆如之所不至者壽而已矣惟公厚性寬中智謀深靜秉儀類以賦明命植端誠以糾王慝講功述職遠意長利執德之柄蹈禮之輿致其用以格天啟其心以沃聖協建皇極爲宗工元龜雅好左氏春秋班氏史得考父之恭范宣之讓驃衛之功畧黃韓之教化又嘗慕太史公自敘著行紀一篇詞不矜大而事皆明備有子五人曰殿中少監鍊太子中允鎬太子司議郎鉅櫟陽尉鋼雲陽尉鐵著位於兩宮

以奉朝請試吏於縣內以修事任食德而才稟訓而忠皆以純孝致其哀敬令弟輔國大將軍右領軍衛將軍武當郡王玘與諸孤等推烝彝景鐘之義因識表以聞有詔詞臣刻石傳信乃採其贊書侯表作神道碑銘曰

北戴斗極陰方尚武元金朱轡錫命都府太師閒代感會雲雨四征庇人九合尊主昔未成童則能肆勤卓行深入致果忘身弱冠摧鋒環列南軍中興之後書社策勳援枹兩河轉戰三秦靈朔郇邠所居必聞出統蕃衛入司徼巡時丁阨難節冠羣倫逋誅煽結狂穢官闕西平鞠旅公亦

授鉞既臨延秋如火烈烈休士退舍時惟不伐侵沴濛濛  
蒲津未通北平釋位公實撫封胥命長春克成厥功開壁  
勞軍靡有不公以律則臧在和而克時惟太師有嚴有翼  
乃數仁澤乃布條職時惟太師有功有德三公二府是將  
是陟穰印易名以尊以飾材官介士鹵簿悽惻大隧鮮原  
終南之北萬邦作憲永代是式追琢馨香與唐無極